



*L'urs stat si per pudair
observar e savurar meglier.*


© WWF / Canon / Eric FLIPSE

Derasaziun da l'urs brin en l'Europa

Preschientscha permanenta

Preschientscha occasiunala cumprovada

Singulas observaziuns na cumprovadas



© KORA / LCIE, 2007

L'urs brin

La carta d'identitat

La famiglia

L'urs brin appartegna als urs gronds. Ses parents èn l'urs da glatsch, l'urs malai, l'urs tibetan, l'urs dals lefs, l'urs dals egliers, l'urs nair ed il panda.

La grondezza ed il pais

Ils pli gronds urs brins viven en l'Alasca. Sch'els stat-
tan sidretg pon els avair ina grondezza da fin 3 m
ed els pon pasar fin 700 kg. L'urs brin che viva en las
Alps è in urs pitschen. El vegn fin 2 m grond e paisa
mo circa 180 kg. Las femnas èn in bun pau pli
pitschnas ch'ils mastgels. Ellas pon avair in pais
maximal da circa 150 kilos.

Tratgs particulars

Ils urs brins pon far veritabels spurts cun fin a 50
km/h (kilometers l'ura)! Quai capita però mo, cura
ch'els cumbattan per il territori e van a chatscha
sur distanzas curtas.

Ils urs brins selvadis vegnan circa 20 onns vegls.
Ils urs brins han in nas excellent ed ina buna udida.
La vesida è main sviluppada.

L'abitadi

L'urs brin viva en l'entira emisfera nord dal mund.
En l'America ha el survegnì il num popular
"Grizzly", en l'Alasca ha el num "urs codjac".

Ils urs brins èn animals da guaud; els prefereschan
regiuns da muntogna quietas cun guauds exten-
dids. Per lur sien d'enviern dovran els cuvels en la
grippa spundiva.

Per ch'ils urs hajan avunda da magliar, sto il guaud
avair ina gronda purschida da plantas magliablas
ed avunda animals da preda.

Il dumber e territori da derasaziun

En tut il mund vivan oz anc circa 200'000 urs brins.
En l'Europa èn quai var 50'000. En las Alps dum-
bran ins var 38 urs.

En l'Europa vivan ils urs sparpagliads en differents
territoris. I dat mo paucas populaziuns grondas en
il nord da l'Europa (Finlanda, Russia e Scandinavia)
ed en l'Europa orientala (Carpatas e Balcan).

Il cumportament

Ils urs brins vivan sulets, las femnas ed ils mastgels s'inscuntran mo per la copulaziun.

La grondezza dal territori dependa da la purschida da nutriment – in urs sulet dovra ina surfatscha da 60 fin 100 kilometers quadrat. (Il lai da Turityg è 100 kilometers quadrat.)

Ils urs na defendan betg vehementamain lur territori. Uschia poi esser che territoris dad urs sa cruschan. Normalmain eviteschan ils urs in l'auter, surtut las femnas cun giuvens van ord via als mastgels.

Ils urs brins, che vivan en regiuns fraidas, fan ina sien d'enviern. Els enverneschan en cuvels. Durant la sien d'enviern dovrano els lur reservas da grass.


La temperatura dal corp sa sbassa per 5 grads celsius. Il cor batta quatter giadas pli plaun che la stad. Uschia dovrano ils urs pli pauca energia.

La tschertga da nutriment

Ils urs brins maglian tut. Trais quarts da lur nutriment sa cumpona da puma, fritga ed erva. Els maglian quai che vegn gist davant lur grugn. Mintgatant tschiffan els ina mieur, maglian ovs dad utschels e sch'els chattan ina capiergna, alura datti in past da charn.

Mintgatant spoglian ils urs era avieulers e maglian las patgnas. Era muntaneras da nursas n'en betg adina segiras – ma ils urs en plitost chatschaders maladesters e tschiffan en media mo ina nursa ad onn.

Suenter la sien d'enviern na maglia l'urs brin anc betg fitg bler, perquai che sia digestiun sto l'emprim puspè vegnir en funcziun. Perquai perda l'urs la primavaira anc adina paisa. La stad maglia el alura in bun pau dapli, circa 10 kg a di. L'atun maglia el tut tge ch'el po. Mintga di prenda el tiers in mez kilo. Quai è impurtant, perquai ch'el sto far reservas per la proxima sien d'enviern.



L'urs brin sa er nudar fitg bain.



La reproducziun ed ils pitschens

Ils urs brins copuleschan durant la stad tempriva, tranter il matg ed il zercladur.

Ils urs pitschens naschan suenter circa 6 emnas. Per tratga èn quai mintgamai 1 fin 3 pitschens. Els naschan en il cuvel d'enviern, qua tettan els en il stgir.

La primavaira banduna la mamma il cuvel ed ils urs giuvens exploreschan cun mirveglias lur conturn, senza però s'allontanar memia lunsch da la mamma. L'ursa ha da far la pel plaina per manteignair la survista. Tuttina mora circa la mesadad da tut ils urs giuvens anc avant l'emprim anniversari.

Ils urs giuvens ston emprender bler. Lur mamma als mussa durant in onn e mez il comportament en situaziuns da privel, durant la chatscha e la tschertga da nutriment. Suenter ston els ir vinavant e guardar per sasezs.





L'urs brin en l'Europa

En il 19avel tschientaner valeva l'urs brin sco inimi da l'uman. L'uman ha fatg chatscha sin el ed al ha extirpà en bleras regiuns. En Svizra è l'ultim urs vegnì sajettà l'onn 1904 en Engiadina Bassa.

En Svizra è l'urs protegì dapi l'onn 1962. Actualmain na datti nagins plans per metter en libertad in urs. La stad 2005, suenter pli che 100 onns, è l'emprim urs turnà en Svizra.

En l'Austria è arrivà in urs en ils onns 1980. Igl era in mastgel. En il rom d'in project da reintroducir urs dal WWF, è vegnida messa ina femna en ses territori. Ils dus han gì pitschens ensemble. Ulteriurs urs èn immigrads e la populaziun è creschida a fin 25 animals. Oz vivan però be 3 fin 4 da quels urs.

Tgi che reintroducescha urs, sto resguardar che urs fan era donns: els spoglian avieulers, stgarpan qua e là ina nursa ed engolan fritga. Per ch'ils urs na vegnian betg odiads, ston ins indemnizar ils possessurs e las possessuras.

Mitus

L'urs da cuvel era l'urs il pli stamentus che ha vivì sin terra. Ils avdants dals cuvels han fatg chatscha sin el ed al han venerà avant radund 40'000 onns. Dissegns en cuvels dal temp da crap, ch'ins chatta anc oz en Frantscha ed en Spagna, mussan quai. Cura che l'urs da cuvel è mort ora circa 10'000 onns avant Cristus, han ils umans cumenzà a venerar l'urs brin.

Anc oz datti cults dad urs (veneraziuns solennas, rituals). Pievels da chatschaders dal Nord sepuleschan l'ossa da l'urs, suenter ch'els al han mazzà e mangià sia charn. Uschia po l'urs puspè returnar sin il mund. L'urs è il dieu dal guaud e per intgins pievels schizunt il retg dals animals.

En paraulas ed en il teater arriva el adina puspè tar nus sco "cumpar urs" – per il pli sco in gnugnun paschaivel.

Ils urs èn normalmain fitg spuretg. Sch'els sa sentan smanatschads e senza via da fugia pon els però attatgar umans. Perquai na dastgan ils urs betg vegnir pavlads, uschiglio perdan els la tema da l'uman. Surtut en l'America dal Nord ed en l'Europa orientala s'avischinan ils urs durant envierns crivs als abitadis dals umans per tschertgar vanzadiras en il rument.

L'urs brin ed il WWF

En l'Austria ha il WWF lantschà il zercladur 1989 in project da reintroducir urs, per che l'urs immigrà da la Slovenia na stoppia betg pli ir sulet per ils guauds enturn.

Segir è ch'il WWF na vegn a laschar liber nagins urs en Svizra. Il WWF Svizra s'engascha però per che nus acceptian il return da l'urs ed al dettian ina schanza. Spazi per viver e nutriment datti era en las Alps svizras avunda.

Il WWF Svizra infurmescha la populaziun locala per ch'ella conuschia meglier l'urs. El gida er ils apiculturs a proteger ils avieulers cun saivs electriques. Muntaneras da nursas accumpagnadas da chauns da defensiun èn protegidas. Il WWF fa squitsch politic e pretenda in sostegn adequat per ils purs.





Ulteriuras infurmaziuns

Da survegnir tar il WWF

WWF (2008)

Panda Club 1/08: *Braunbär.*

WWF (2004)

Panda Club 5/04: *Bären.*

WWF (2001)

Luchs, Wolf und Braunbär.

Nr. d'empustaziun. 1765.10.

Cudeschs

Schmidt, A.; Schmidt, Ch. (1989)

Bären. Das Buch der Tierfamilien, volum 1

Lucerna: Kinderbuchverlag.

Bright, M. (2003)

Bären. Stuttgart: Kosmos.

Lüps, P. (1990)

Braunbären. Mustér: chasa editura Desertina.

Pott, E. (2005)

Ravensburger Tierlexikon von A-Z. Ravensburg.

Ravensburger Buchverlag.

Paccalet, G; Paccalet, Y. (2002)

Bären; Kinder der Berge. Tiercomic.

WWF/Zytglogge Verlag. (exhaust, ev. anc da survegnir en biblioteca)



Internet

www.wwf.ch/baer

Infurmaziuns dal WWF davart l'urs brin cun in link che declera, co che vus as stuais cumporlar, sche vus inscuntrais in urs en la natira.

www.ms-net.ch/baeren.htm

Ils differents urs sa preschentan e mussan nua ch'els vivan e tge ch'els maglian.

www.kora.ch

Qua chattas ti in PDF cun detagls davart ils urs.

www.pandazone.at/campaigns/wwfbaerenkampagne

Infurmaziuns interessantas davart urs dretgs e fauss.

Empustar pos ti tar il WWF Svizra per telefon, posta u e-mail. L'addressa chattas ti sutvert a dretga. Il termin da furniziun è in'emna.

Sche nagin pretsch n'è inditgà, pos ti empustar da mintga broschura in exemplar gratuit.

